

Lutherano, JOH. MAURITII MOMMERS *Luthero Reformato* opposito, apparet, ejusque Præf. p. XV. Videas modo STRIMESII *Kurtzen Entwurf der Einigkeit* p. 93. EJUSD. *Ingenuum Inquisitionem in Controversias Evangelic.* p. 450. seq. & MASSONII *Anatomiam Universalem Triumphantem*, Part. 4. p. 292. &c. Atque horum omnium vestigia DREAS fideliter est sequutus.

§. VII

Ut vero Reformati, inque his DREAS, eo majori evidentia, (quod illis quidem videtur) suam de absoluto electionis decreto doctrinam his artic. XI. F. C. verbis assertam esse, nobis persuadeant: insolenter, teste SCHLOSSERO *l. c.* p. XX. de eo gloriantur, quod doctrina opposita jam ante F. C. promulgationem in MELANCHTHONE improbata & rejecta fuerit, quippe qui in *Locis Theologicis* primoque Operum tomo fol. 167. docuerit: *in homine esse & esse oportere causam aliquam, cur alii ad salutem eligantur, alii abjiciantur.* Oleum igitur operamque omnem, uti dicitur, nos non esse perdituros, existimamus, si in hanc rem paullo curatius inquiramus, ut, eadem cum suo nexu rite perspecta, an Reformati justam sibi de improbata MELANCHTHONIS doctrina gratulandi habeant causam, pervideamus. Observandum itaque est, MELANCHTHONEM in ultimis suis *Locis*, & quidem in edit. A. 1548. in artic. de *Libero Arbitrio*, scripsisse: *Cum promissio sit universalis, nec sint in Deo contrarie voluntates: necesse est, in nobis esse aliquam discriminis causam, cur Saul abjiciatur, David recipiatur. Id est, necesse est, aliquam esse actionem dissimilem in his duobus.* Hæc dextre intellecta vera sunt, cetera. Sensus vero hic est: Deus voluntate antecedente omnium hominum vult salutem. *Ezech. 33. 11. Act. 17. 30. 31.* Cum autem in Deo contrarie & inter se pugnantes voluntates locum habere nequeant: per se patet, Deum non plerosque absolute rejecisse, nec alios, eosque paucissimos, absolute elegisse. Effent vero contrarie in Deo voluntates, si omnium hominum vellet salutem, simulque maximam illorum partem absolute damnaffet,